



IZVJEŠTAJ

O FINANSIJSKOJ REVIZIJI INSTITUTA ZA MJERITELJSTVO BOSNE I HERCEGOVINE ZA 2011. GODINU

Broj: 01-02/03-08-16-1-433/12

Sarajevo, juni 2012. godine



SADRŽAJ

I MIŠLJENJE REVIZORA.....	3
II NALAZI I PREPORUKE	5
1. Uvod	5
2. Postupanje po ranijim preporukama	5
3. Sistem internih kontrola	6
4. Budžet	6
5. Finansijski izvještaji	8
6. Pregled rashoda budžeta	8
6.1. Tekući izdaci	8
7. Bilans stanja.....	11
8. Javne nabavke	11
9. Ostalo.....	11
10. Korespondencija	12
III PRILOG	13
FINANCIJSKI IZVJEŠTAJI I IZJAVA O ODGOVORNOSTIMA	13
Izjava o odgovornostima rukovodstva	
Pregled rashoda budžeta za 2011. godinu	
Bilans stanja na 31.12.2011. godine	

I MIŠLJENJE REVIZORA

Uvod

Izvršili smo reviziju finansijskih izvještaja i usklađenosti poslovanja sa odgovarajućim zakonima i propisima za godinu koja se završava 31. decembra 2011. godine u **Institutu za mjeriteljstvo Bosne i Hercegovine** (u daljnjem tekstu: Institut).

Odgovornost rukovodstva

Rukovodstvo Instituta je odgovorno za pripremu i fer prezentaciju finansijskih izvještaja u skladu sa prihvaćenim okvirom finansijskog izvještavanja, tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu budžeta institucija BiH. Ova odgovornost uključuje i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže značajne pogrešne iskaze uslijed prijevare ili greške.

Pored odgovornosti za pripremu i prezentaciju finansijskih izvještaja, rukovodstvo Instituta je također odgovorno da osigura da su finansijske transakcije i informacije koje su prikazane u finansijskim izvještajima usklađene sa odgovarajućim zakonima.

Odgovornost revizora

Naša je odgovornost da izrazimo mišljenje o finansijskim izvještajima na osnovu revizije. Reviziju smo izvršili u skladu sa Zakonom o reviziji institucija Bosne i Hercegovine (Službeni glasnik BiH, broj 12/06) i Međunarodnim standardima vrhovnih revizionih institucija (ISSAI). Ovi standardi zahtijevaju da postupamo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže značajne pogrešne iskaze. Revizija uključuje obavljanje postupaka u cilju pribavljanja revizionih dokaza o iznosima i objavama u finansijskim izvještajima. Izbor postupka je zasnovan na prosuđivanju revizora, uključujući procjenu rizika značajnog pogrešnog prikazivanja u finansijskim izvještajima uslijed prijevare ili greške. Prilikom procjene rizika revizor razmatra interne kontrole koje su relevantne za pripremu i fer prezentaciju finansijskih izvještaja u cilju osmišljavanja revizionih postupaka koji su odgovarajući u datim okolnostima, ali ne u svrhu izražavanja mišljenja o efikasnosti internih kontrola. Revizija također ocjenjuje finansijsko upravljanje, funkciju interne revizije i sistem internih kontrola.

Pored odgovornosti za izražavanje mišljenja o finansijskim izvještajima, naša odgovornost je izražavanje mišljenja o tome da li su finansijske transakcije i informacije koje su prikazane u finansijskim izvještajima, po svim bitnim pitanjima, usklađene sa odgovarajućim zakonima. Ova odgovornost uključuje obavljanje procedura kako bi dobili revizione dokaze o tome da li se sredstva koriste za odgovarajuće namjene koje su određene zakonom. Ove procedure uključuju procjenu rizika od značajnih neslaganja sa zakonima.

Vjerujemo da su pribavljeni revizioni dokazi dovoljni i odgovarajući i da osiguravaju osnovu za naše mišljenje.



Mišljenje

Prema našem mišljenju, finansijski izvještaji Instituta prikazuju fer i istinito, po svim bitnim pitanjima, stanje imovine i obaveza na 31. decembra 2011. godine i rezultate poslovanja i izvršenja budžeta za godinu koja se završila na navedeni datum u skladu sa prihvaćenim okvirom finansijskog izvještavanja.

Finansijske transakcije i informacije prikazane u finansijskim izvještajima bile su u svim značajnim aspektima usklađene sa odgovarajućim zakonima i propisima.

Sarajevo, 13.06.2012. godine

GENERALNI REVIZOR

Milenko Šego

**ZAMJENIK
GENERALNOG REVIZORA**

Dževad Nekić

**ZAMJENICA
GENERALNOG REVIZORA**

Božana Trninić

II NALAZI I PREPORUKE

1. Uvod

Pravni status Instituta regulisan je Zakonom o osnivanju Instituta za mjeriteljstvo BiH, Zakonom o mjeriteljstvu BiH i Zakonom o mjernim jedinicama BiH.

Institut, kao državna naučno-stručna institucija za oblast mjeriteljstva i mjerne tehnike, između ostalog nadležan je da:

- priprema nacрте zakonskih akata i drugih propisa iz domena svoje nadležnosti i koordinira donošenje propisa po kojima rade institucije za mjeriteljstvo u entitetima;
- ostvaruje etalonsku bazu na nivou državnih etalona i nadzire ostvarivanje etalonske baze sekundarnih i radnih etalona;
- osigurava sljedivost mjerenja u BiH do međunarodnih etalona mjernih jedinica;
- uspostavlja, imenuje i nadzire mjeriteljske laboratorije;
- nadzire i koordinira rad službi za kontrolu predmeta od plemenitih metala;
- vrši kalibraciju i verifikaciju etalona (mjerila), referentnih materijala i opreme koje koriste institucije u entitetima za mjeriteljstvo u skladu sa propisima usklađenim sa preporukama i dokumentima Međunarodne organizacije za zakonsko mjeriteljstvo (OIML);
- bavi se istraživačko-razvojnou djelatnošću, predlaže i određuje prioritete realizacije razvojnih projekata i učestvuje u međunarodnim projektima;
- izrađuje studije, strategije razvoja, projekte, analize i druge poslove u cilju izgradnje mjeriteljskog sistema u BiH i mjeriteljske laboratorijske infrastrukture;
- provodi međunarodne ugovore o saradnji u oblasti mjeriteljstva te učestvuje u radu međunarodnih organizacija i u njima predstavlja Bosnu i Hercegovinu.

Institut ima svojstvo pravnog lica sa sjedištem u Sarajevu.

2. Postupanje po ranijim preporukama

Ured za reviziju institucija BiH (u daljnjem tekstu: Ured) izvršio je finansijsku reviziju Instituta za 2010. godinu te izrazio mišljenje sa rezervom i isticanje predmeta na finansijske izvještaje i zakonitost poslovanja.

Institutu su predložene preporuke kojima se sugeriše preduzimanje određenih aktivnosti na unaprjeđenju poslovanja i otklanjanja nepravilnosti u daljem poslovanju.

Institut je dostavio odgovor Uredu saglasno članu 16. stav 3. Zakona o reviziji o preduzetim aktivnostima radi prevazilaženja slabosti i nedostataka koji su identifikovani u Izvještaju o reviziji za 2010. godinu.

Osvrtom na preporuke revizije date u Izvještaju o reviziji za 2010. godinu te uvidom u preduzete aktivnosti, utvrdili smo sljedeće:

Realizovane preporuke:

- Pravilnikom o kriterijima za isplatu novčane nagrade–stimulacije od 30.3.2011. godine, Institut je utvrdio mjerila za vrednovanje rezultata rada za isplatu stimulacija;

- Institut je pravdanje izdataka za mobilne telefone vršio na osnovu originalne dokumentacije (originalnih računa), koji sadrže specifikaciju izvršenih usluga;
- Vozilo *Renault Clio* koje je koristio direktor Instituta dato je na raspolaganje samostalnom referentu-mjeritelju;
- U 2011. godini Institut nije sa svojim zaposlenicima zaključivao ugovore o autorskom honoraru;
- Institut je smanjio izdatke na osnovu ugovora o djelu i nije zaključivao ugovore o djelu za sistematizovana radna mjesta;
- Kod provođenja procedura javnih nabavki za izbor najpovoljnijeg dobavljača, Institut je zahtijevao uvjerenja o plaćenom socijalnom osiguranju i uvjerenje o plaćenom porezu i uglavnom je na vrijeme pokretao procedure izbora najpovoljnijeg dobavljača;
- Institut je usaglasio prihode iskazane u pomoćnim evidencijama sa prihodima iskazanim u glavnoj knjizi Instituta.

Realizacija preporuka u toku:

- Donošenjem novih i primjenom postojećih internih propisa Institut kontinuisano radi na unaprjeđenju sistema internih kontrola i planiranja budžeta u skladu sa instrukcijom Ministarstva finansija i trezora BiH.

3. Sistem internih kontrola¹

Institut je odgovoran za kreiranje, primjenu i održavanje internih kontrola koje su relevantne za pripremu i prezentaciju finansijskih izvještja i usaglašenost poslovanja sa zakonima i propisima.

Revidiranjem poslovanja Instituta uočili smo da je Institut u cilju unaprjeđenja sistema internih kontrola donio novu Odluku o korištenju službenih mobilnih i fiksnih telefona i Pravilnik o kriterijima za isplatu novčane nagrade-stimulacije. Iako je Institut donio navedena interna akta, uočili smo da su potrebna dalja unaprjeđenja sistema internih kontrola kod izdataka za mobilne telefone, usluge reprezentacije i ugovore o djelu.

Prema Zakonu o internoj reviziji (Službeni glasnik BiH broj 27/08), Institut ne ispunjava kriterije za uspostavu vlastite jedinice za internu reviziju, već će se ista obavljati putem Centralne jedinice za internu reviziju institucija BiH u okviru Ministarstva finansija i trezora BiH.

4. Budžet

Institut je za 2011. godinu uputio zahtjev za dodjelu sredstava iz budžeta Ministarstvu finansija i trezora BiH kojim je budžet projektovan u visini od 2.709.924 KM. Međutim, zbog neusaglašenih stavova u vezi donošenja budžeta tokom cijele 2011. godine, ovaj zahtjev nije razmatran i nije prošao proceduru redovnog usvajanja.

¹ Sistem internih kontrola je jedinstven proces kojeg uvodi rukovodstvo i zaposleni institucije, a osmišljen je za pružanje razumnog uvjerenja da se u izvršavanju misije institucije postižu sljedeći opći ciljevi: efikasne poslovne operacije, pouzdano finansijsko izvještavanje, usklađenost poslovanja sa zakonima i propisima i zaštita imovine.

Finansiranje Instituta u 2011. godini realizovano je u skladu sa odlukama o privremenom finansiranju institucija BiH po kvartalima (četiri odluke), te Odlukom o operativnim mjerama za provođenje Odluke o privremenom finansiranju institucija BiH za period januar-mart 2011. godine. Ove odluke su predviđale kvartalno raspolaganje u visini $\frac{1}{4}$ odobrenog budžeta za 2010. godinu i to isključivo za tekuće izdatke bez kapitalnih izdataka.

Međutim, Ministarstvo finansija i trezora BiH je dijelom vršilo umanjeње budžeta po odlukama o privremenom finansiranju zbog ušteda u budžetu, tako da je Institut tokom godine raspolagao sa ukupno 2.193.057 KM budžeta, koliko je i bilo maksimalno dozvoljeno po odlukama o privremenom finansiranju. Institutu su odobrene novčane donacije u iznosu 1.602.442 KM tako da je ukupno raspoloživi budžet Instituta za 2011. godinu iznosio 3.795.499 KM.

Zakon o budžetu institucija BiH i međunarodnih obaveza BiH za 2011. godinu² usvojen je tek po isteku fiskalne godine, odnosno u 2012. godini. U skladu sa ovim zakonom Institutu su odobrena sredstva iz budžeta u visini njegovog izvršenja budžeta za 2011. godinu, odnosno u visini od 3.795.499 KM.

Ukupno izvršenje budžeta Instituta, za tekuće izdatke, u 2011. godini iznosi 2.193.052 KM, što u odnosu na izvršenje budžeta, za tekuće izdatke, u 2010. godini predstavlja povećanje za 113.787 KM, odnosno 5%.

Struktura odobrenog i izvršenog budžeta Instituta po vrsti rashoda prikazana je u prilogu Izvještaja u Tabeli I – Pregled rashoda budžeta za 2011. godinu.

- **Planirani i realizirani programski zadaci**

Plan rada-aktivnosti Instituta pripremljen je na osnovu Zakona o mjeriteljstvu BiH, Zakona o mjernim jedinicama BiH i Zakona o osnivanju Instituta za mjeriteljstvo BiH.

Planirane aktivnosti u 2011. godini predviđale su realizaciju poslova iz domena provođenja zakona sa ciljem zadovoljenja funkcije Instituta u BiH i daljeg jačanja međunarodno prihvaćenih kompetencija Instituta.

Institut je planirao aktivnosti koje proizlaze iz Sporazuma o stabilizaciji i pridruživanju i obaveze koje su definisane prema prioritetima u Evropskom partnerstvu.

Osnovni zadaci Instituta u 2011. godini bili su provođenje: svih relevantnih dokumenata Evropske zajednice, tj. direktiva (o mjernim instrumentima, o neautomatskim vagama, o ambalaži i ambalažnom otpadu, kao i drugih direktiva u kojima se mjeriteljstvo spominje kao relevantna oblast za provođenje tih direktiva), akata evropskih organizacija za mjeriteljstvo (vodiči Evropske kooperacije nacionalnih mjeriteljskih instituta (EURAMET) i procedure Evropske kooperacije u oblasti zakonskog mjeriteljstva (WELMEC).

Izvještaj o radu-aktivnostima: Institut se u 2011. godini intenzivno razvijao u smislu jačanja kapaciteta institucije i dokazivanja kompetencija Instituta na međunarodnoj razini te su u toj domeni realizovane sljedeće aktivnosti:

- Bosna i Hercegovina je 24.05.2011. godine postala pridruženi član Međunarodne generalne konferencije za utege i mjere. Nakon toga, Institut je

² Službeni glasnik BiH, broj 12/12 od 14.02.2012. godine

potpisao Ugovor o međusobnom priznavanju sa Međunarodnim komitetom za utege i mjere i Međunarodnim biroom za utege i mjere. Potpisivanjem ovih ugovora BiH je postala dio međunarodne grupe od 90 zemalja koje jedna drugoj priznaju etalone koje održavaju državni instituti za mjeriteljstvo i priznaju certifikate koje ti instituti izdaju, ukoliko su kalibracione i mjeriteljske sposobnosti tih etalona upisani u Međunarodnu bazu podataka ključnih poređenja.

- Učestvovanjem Instituta u radu 10 tehničkih komiteta EURAMET-a i 8 radnih grupa WELMEC-a, unaprijeđena je saradnja sa EURAMET-om i WELMEC-om, a direktor Instituta je i član predsjedništva WELMEC-a.

- Kroz projekte IPA 2007 i IPA 2008 nabavljeni su i pušteni u rad etaloni i mjerila te formirano 14 novih državnih laboratorija sljedivih do međunarodnih etalona mjernih jedinica. Kroz Projekat razvojne pomoći Vlade Republike Slovenije nabavljena je oprema i otvorene su 4 laboratorije.

- Institut je u okviru redovne aktivnosti izdavao certifikate o usklađenosti i odobrenju tipa, pokrenuo saradnju sa najvažnijim privrednim subjektima, unaprijedio i recertifikovao sistem kvaliteta prema ISO 9001 i sistem kvaliteta u laboratorijima prema ISO 17025.

- Od međunarodnih aktivnosti, Institut je potpisao Memorandum o razumijevanju i saradnji sa Direkcijom za mjere i dragocene metale Republike Srbije i Memorandum o razumijevanju o „Saradnji u oblasti mjeriteljstva“ Instituta za kovinske materijale i tehnologije iz Ljubljane.

Institut je 13.03.2012. godine dostavio Izvještaj o radu za 2011. godinu Vijeću ministara na usvajanje.

5. Finansijski izvještaji

Institut je u skladu sa Pravilnikom o finansijskom izvještavanju institucija BiH (Službeni glasnik BiH, broj 33/07) sačinio godišnji finansijski izvještaj za 2011. godinu koji sadržava bilans stanja, pregled rashoda budžeta po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava i pregled kapitalnih ulaganja po vrstama, projektima i opremi. Također, sastavni dio godišnjeg finansijskog izvještaja predstavlja analiza izvršenja budžeta koja je sastavljena u tekstualnom obliku.

Godišnji finansijski izvještaj predat je 02.03.2012. godine Ministarstvu finansija i trezora BiH.

6. Pregled rashoda budžeta

6.1. Tekući izdaci

- **Bruto plaće**

Ukupno ostvarene bruto plaće i naknade plaća iznose 1.305.918 KM. Prosječan broj zaposlenih u Institutu u toku godine iznosio je 51. Na 31.12.2011. godine Institut je imao 53 zaposlenih od čega je, u 2011. godini, primljeno 11, a tri zaposlena su napustila Institut. Plaće zaposlenih se obračunavaju u skladu sa odredbama Zakona o

plaćama i naknadama u institucijama Bosne i Hercegovine. U 2011. godini je izvršena isplata stimulacija za 12 zaposlenih u neto iznosu od 9.589 KM.

- **Izdaci telefonskih i poštanskih usluga**

Izdaci telefonskih i poštanskih usluga ostvareni u 2011. godini iznose 40.885 KM i veći su u odnosu na prethodnu godinu za 1.838 KM ili 5%. Ovi troškovi odnose se na fiksne telefone (19.624 KM), mobilne telefone (8.497 KM), troškove interneta (7.026 KM) i poštanske usluge (5.739 KM).

Izdaci za mobilne telefone ostvareni su u 2011. godini u iznosu 8.497 KM, što je za 524 KM više u odnosu na 2010. godinu ili za 7%, odnosno 710 KM posmatrano na mjesečnom nivou. Pravo na korištenje službenih mobilnih telefona u skladu sa internim pravilnikom od 06.05.2011. godine koristi osam zaposlenika (u odnosu na pet u 2010. godini), u rasponu od 500 KM za direktora do 70 KM za samostalnog referenta – mjeritelja. Navedenim pravilnikom, pravo na korištenje mobilnih telefona povećano je za direktora sa 220 na 500 KM i za pomoćnika direktora sa 200 na 300 KM. Prosječna mjesečna potrošnja kreće se u iznosu od 305 KM za direktora do 56 KM za samostalnog referenta – mjeritelja.

S obzirom na visinu izdataka za ove namjene mišljenja smo da ove izdatke treba racionalizovati dok Vijeće ministara ne donese podzakonske akte u ovoj oblasti.

- **Izdaci za usluge prijevoza i goriva i tekućeg održavanja**

Izdaci vezani za upotrebu službenih vozila ostvareni su u 2011. godini u iznosu 20.064 KM i manji su za 2.909 KM u odnosu na 2010. godinu, a odnose se na izdatke za gorivo (11.775 KM), registraciju vozila (2.426 KM), troškove održavanja vozila (3.005 KM) i osiguranje vozila (2.858 KM).

Službena vozila: Institut raspolaže sa šest službenih vozila od čega dva vozila nisu u upotrebi zbog neispravnosti i nisu registrovana. Korištenje službenih vozila je regulisano Pravilnikom o uslovima i načinu korištenja službenih vozila Instituta od 02.02.2009. godine. Pravo na korištenje službenih vozila dato je direktoru, zamjeniku direktora, pomoćniku direktora, kao i za obavljanje redovnih poslova na terenu zaposlenih raspoređenih na radnom mjestu samostalni referent – mjeritelj.

- **Unajmljivanje prostora ili zgrada:**

Izdaci za unajmljivanje uredskog prostora u 2011. godini iznosili su 193.784 KM i isti se odnose na zakup prostora u objektu GP ŽGP d.d. Sarajevo do 23.03.2011.godine i zakup prostora u objektu Željezničarske štedno-kreditne zadruge od navedenog datuma. Ukupna površina zakupljenog prostora u objektu GP ŽGP iznosila je 534 m², a mjesečna cijena zakupa je bila 16 KM/m² plus PDV, dok površina zakupljenog prostora u objektu Željezničarske štedno-kreditne zadruge iznosi 1.215/m², a mjesečna cijena zakupa je 14 KM/m² plus PDV.

Testiranjem smo se uvjerali da su fakture zakupa u skladu sa Ugovorima u zakupu.

- **Ugovorene usluge**

Izdaci za ugovorene usluge ostvareni su u iznosu od 178.044 KM i manji su za 31.720 KM u odnosu na ostvarenje u prošloj godini. Najznačajniji troškovi se odnose na ostale nespomenute usluge i dadžbine (103.452 KM), ugovore o djelu (36.490 KM), usluge reprezentacije (10.863 KM), usluge štampanja (6.765 KM) i usluge održavanja konferencija i obrazovanja (6.653 KM).

Usluge reprezentacije: Realizovani troškovi za ove namjene tokom 2011. godine iznose 10.863 KM i za 220 KM su manji u odnosu na prošlu godinu, a regulisani su internom odlukom o reprezentaciji i poklonima kojom je definisano šta se smatra reprezentacijom.

Reprezentacija je razdvojena na tzv. „internu“ i „eksternu“ reprezentaciju. Pravo na internu reprezentaciju imaju direktor, zamjenik direktora, pomoćnici direktora i šefovi internih organizacionih jedinica. Direktor ima pravo na internu reprezentaciju u iznosu od 150 KM mjesečno, a ostali u iznosu od 50 KM mjesečno.

Ugovori o djelu: Institut je tokom 2011. godine utrošio 36.490 KM za isplate na osnovu ugovora o djelu što je za 10.000 KM manje nego u 2010. godini. Isplate su izvršene za 13 lica, od kojih su dva lica angažovana na period od 12 mjeseci i jedno lice na period od devet mjeseci. Isplaćene naknade na osnovu ugovora o djelu kretale su se u rasponu od 360 do 1.000 KM.

Institut je angažovao lica po ugovoru o djelu uglavnom za poslove čišćenja prostorija, ažuriranje i rad na web stranici, održavanje generalne skupštine EURAMET-a i druge aktivnosti za realizaciju dobijenih donacija.

Mišljenja smo da Institut treba preispitati potrebu angažovanja lica na osnovu ugovora o djelu na 12 mjeseci i da nastavi sa smanjenjem ovih izdataka u cilju racionalizovanja ovih troškova.

Ostale nespomenute usluge i dadžbine ostvarene su u iznosu 103.452 KM, a odnose se na doniranu laboratorijsku opremu, a obuhvaćaju usluge uspostave kalibracione laboratorije za električne veličine (faktura IMT u iznosu od 80.580,20 KM), troškove naknade za povećanje priključne snage objekta Dolina 6 (faktura Elektroprivreda d.d. br. 202-1250/11 u iznosu od 14.386,58 KM), troškove servisiranja/tehničkog ocjenjivanja (faktura BEV T11-0144 u iznosu od 2.987,16 KM) te troškove nadzorne provjere za održavanje valjanosti certifikata (certifikacijska provjera sistema upravljanja kvalitetom u organizaciji Instituta) u iznosu od 1.564,66 KM i troškove carinske garancije i kompenzatornu kamatu za navedenu laboratorijsku opremu.

Usluge održavanja konferencija i obrazovanja ostvarene su u iznosu 6.653 KM, a odnose se na troškove kotizacija za učestvovanje na seminarima (700 KM „Komunikacije sa strankama sa posebnim osvrtom na teške stranke“ – samostalni referent; 559,20 KM „Edukacija o javnim nabavkama“ – direktor; 352,05 KM „Workshop“ – vanjski saradnik).

7. Bilans stanja

Ukupna aktiva Instituta odnosi se na novčana sredstva u blagajni 495 KM i stalna sredstva sadašnje vrijednosti 6.476.506. Institut je tokom godine od Evropske unije po projektima IPA 2007 i IPA 2008 dobio nenovčanu donaciju (laboratorijska oprema) nabavne vrijednosti u iznosu 3.578.000 KM i novčanu donaciju Vlade Republike Slovenije za nabavku laboratorijske opreme u iznosu 1.602.441 KM.

Ukupnu pasivu Instituta čine kratkoročne tekuće obaveze (138.524 KM), obaveze prema zaposlenicima (125.032 KM) i izvori sredstava (6.476.506 KM). Kratkoročne tekuće obaveze odnose se na obaveze prema dobavljačima koje su iskazane sa stanjem na 31.12.2011. godine i koje su izmirene u narednoj godini.

Institut je izvršio popis stalnih sredstava, sitnog inventara, novčanih sredstva i obaveza.

8. Javne nabavke

Institut je sačinio plan nabavki roba i usluga za 2011. godinu u iznosu od 186.650 KM (pregovarački 20.000 KM, konkurentski 108.000 KM i direktni sporazum 58.650 KM) i odnosi se na tekuće izdatke, s obzirom da kapitalnih nabavki nije bilo zbog privremenog finansiranja. Zaključno sa 31.12.2011. godine Institut je realizovao nabavke u iznosu od 183.063 KM (putem pregovaračkog postupka 19.728 KM za izvođenje dodatnih radova, konkurentski postupak 100.446 KM i direktni sporazum 62.889 KM).

Proveden je jedan pregovarački, 14 konkurentskih postupaka, dok su ostale nabavke realizovane putem direktnog sporazuma. Svi pokrenuti postupci su završeni izborom najpovoljnijeg dobavljača.

9. Ostalo

- **Donacije**

Ugovorom o donaciji između Vlade Republike Slovenije koju zastupa Centar za međunarodnu saradnju i razvoj i Vijeća ministara BiH kojeg zastupa Institut za mjeriteljstvo BiH od 31.08.2010. godine ugovorena su donatorska sredstva u ukupnom iznosu 1.089.000 EUR, od čega Centar za međunarodnu saradnju i razvoj Slovenije učestvuje sa 820.000 EUR, a Institut sa 269.000 EUR.

Doznačena donatorska sredstva za ovaj program u 2011. godini u iznosu 1.603.624 KM realizovana su u iznosu od 1.602.441 KM, a ostatak neutrošenih sredstava od 1.183 KM vraćen je donatoru. Institutu za mjeriteljstvo Slovenije je za izvršene usluge plaćeno iz budžeta 70.000 EUR tako da su ostala nerealizovana sredstva iz budžeta u iznosu 199.000 EUR. Cilj projekta je uspostavljanje laboratorije za električne veličine i laboratorije za ispitivanje sigurnosti električnih uređaja i elektromagnetne kompatibilnosti. Sredstva donatora namijenjena su za nabavu laboratorijske opreme.



Nakon provedenog međunarodnog otvorenog postupka za 4 lota, izvršena je nabavka laboratorijske opreme ukupne vrijednosti 1.602.441 KM. Oprema je isporučena i stavljena u upotrebu 14.10.2011. godine.

Revizijom je utvrđeno da je program kalibracione laboratorije za električne veličine i elektromagnetne kompatibilnosti završen i da je 14.10.2011. godine izvršen komisijski prijem opreme.

Institut je u skladu sa Sporazumu o implementaciji projekta sačinio finalni izvještaj i dostavio ga donatoru.

10. Korespondencija

Institut nije u ostavljenom roku dostavio komentare na Nacrt izvještaja o reviziji za 2011. godinu, tako da ovaj Izvještaj predstavlja konačani izvještaj bez korekcija u odnosu na Nacrt izvještaja o reviziji za 2011. godinu.

Vođa tima za finansijsku reviziju

Vlatko Malbašić, viši revizor

U reviziji učestvovali:

Nevena Bugarin, revizor

Azra Husić, pomoćni revizor

Rukovodilac Odjela za finansijsku reviziju

Munevera Baftić, viši revizor

Rukovodilac Odjela za razvoj, metodologiju i kontrolu kvalitete

Dragoljub Kovinčić, viši revizor



III PRILOG

FINANCIJSKI IZVJEŠTAJI I IZJAVA O ODGOVORNOSTIMA

Izjava o odgovornostima rukovodstva

Međunarodni standard vrhovnih revizionih institucija (ISSAI 1580) predviđa da revizor treba da dobije odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo **Instituta za mjeriteljstvo Bosne i Hercegovine** (u daljem tekstu: Institut) dužno je da osigura da finansijski izvještaji za 2011. godinu budu izrađeni u skladu sa Zakonom o finansiranju institucija BiH (Službeni glasnik BiH broj 61/04 i 49/09), Pravilnikom o finansijskom izvještavanju institucija BiH (Službeni glasnik BiH broj 33/07) i Pravilnikom o računovodstvu budžeta institucija BiH (Protokol Ministarstva finansija i trezora BiH broj 01-St4-16-1810/05 od 30.05.2005. godine). Rukovodstvo je također obavezno da postupa u skladu sa Zakonom o budžetu institucija BiH i međunarodnih obaveza BiH za 2011. godinu (Službeni glasnik BiH broj 12/12) i pratećim uputstvima, objašnjenjima i smjernicama koje donosi Ministarstvo finansija i trezora BiH, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja i rezultate poslovanja Instituta.

Pri sastavljanju takvih finansijskih izvještaja odgovornosti rukovodstva obuhvataju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije.
- da se u poslovanju primjenjuju važeći zakonski i drugi relevantni propisi;

Rukovodstvo je također odgovorno za čuvanje imovine i resursa od gubitaka, pa stoga i za preduzimanje odgovarajućih mjera da bi se spriječile i otkrile pronevjere i ostale nezakonitosti.

Datum, 30.03.2012.godine

Direktor

Zijad Džemić



Pregled rashoda budžeta za 2011. godinu

Naziv institucije: Institut za mjeriteljstvo Bosne i Hercegovine

Tabela I

Opis	Odobreni budžet	Usklađivanja budžeta	Ukupni budžet (2+3)	Izvršenje budžeta	Index 5/4
1	2	3	4	5	6
1. Tekući izdaci	2.193.057	0	2.193.057	2.193.052	100
Bruto plaće i naknade	1.305.919	0	1.305.919	1.305.918	100
Naknade troškova zaposlenih	184.780	0	184.780	184.780	100
Putni troškovi	114.999	0	114.999	114.998	100
Izdaci telefonskih i pošt.usluga	40.885	0	40.885	40.885	100
Izdaci za energiju i kom. usluge	60.427	0	60.427	60.427	100
Nabavka materijala	38.907	0	38.907	38.906	100
Izdaci za usl. prijevoza i goriva	14.764	0	14.764	14.763	100
Unajmljivanje imovine i opreme	193.785	0	193.785	193.784	100
Izdaci za tekuće održavanje	57.689	0	57.689	57.689	100
Izdaci za osiguranje	2.858	0	2.858	2.858	100
Ugovorene usluge i druge usluge	178.044	0	178.044	178.044	100
2. Kapitalni izdaci	0	0	0	0	0
Nabavka zemljišta	0	0	0	0	0
Nabavka građevina	0	0	0	0	0
Nabavka opreme	0	0	0	0	0
Nabavka ostalih stalnih sreds.	0	0	0	0	0
Rekonstrukcija i inves.održ.	0	0	0	0	0
3. Tekući grantovi	0	0	0	0	0
	0	0	0	0	0
	0	0	0	0	0
I Ukupno (1+2+3)	2.193.057	0	2.193.057	2.193.052	100
II Prosječan broj zaposlenih	53			51	
4. Novčane donacije	1.602.442		1.602.442	1.602.442	100
Kalibraciona laboratorija za el.veličine i EMC	1.602.442		1.602.442	1.602.442	100
III SVEUKUPNO (1+2+3+4)	3.795.499	0	3.795.499	3.795.494	100

Rukovodstvo je ove izvještaje odobrilo dana 29.02.2012. godine.

Direktor:
Džemić Zijad



Bilans stanja na 31.12.2011. godine

Naziv institucije: Institut za mjeriteljstvo Bosne i Hercegovine

Tabela II

Opis	31.12.2010	31.12.2011.	Index 3/2
1	2	3	4
1. Gotovina, krat.potraživanja, razgraničenja i zalihe	6.939	495	7
Novčana sredstva	6.939	495	7
Kratkoročna potraživanja	0	0	0
Kratkoročni plasmani	0	0	0
Interni finansijski odnosi	0	0	0
Zalihe	0	0	0
Kratkoročna razgraničenja	0	0	0
2. Stalna sredstva	1.777.921	6.476.506	364
Stalna sredstva	2.672.053	7.852.494	294
Ispravka vrijednosti	894.132	1.375.988	154
Neotpisana vrijednost stalnih sredstava	1.777.921	6.476.506	364
Dugoročni plasmani	0	0	0
Dugoročna razgraničenja	0	0	0
UKUPNO AKTIVA (1+2)	1.784.860	6.477.001	363

3. Kratkoročne obaveze i razgraničenja	452.674	263.556	58
Kratkoročne tekuće obaveze	340.161	138.524	41
Kratkoročni krediti i zajmovi	0	0	0
Obaveze prema zaposlenima	112.513	125.032	111
Interni finansijski odnosi	0	0	0
Kratkoročna razgraničenja	0	0	0
4. Dugoročne obaveze i razgraničenja	0	0	0
Dugoročni krediti i zajmovi	0	0	0
Ostale dugoročne obaveze	0	0	0
Dugoročna razgraničenja	0	0	0
5. Izvori sredstava	1.777.921	6.476.506	364
Izvori sredstava	1.777.921	6.476.506	364
Ostali izvori sredstava	0	0	0
Neraspoređeni višak prihoda/rashoda	0	0	0

UKUPNO PASIVA (3+4+5)	2.230.595	6.740.062	302
------------------------------	------------------	------------------	------------

Napomena: Pravilnikom o finansijskom izvještavanju institucija Bosne i Hercegovine, čl. 8. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou budžeta institucija Bosne i Hercegovine za tekuću godinu biti uravnotežen.

Rukovodstvo je ove izvještaje odobrilo dana 29.02.2012. godine



Direktor:
Džemić Zijad